

مزاحیہ نظم

راجو کا ٹھہلا

راجو پکڑ سکول چلا یو قاعدو مکو دوجی لایو
گھر ماں تھوڑو جھو کم آ یو راجو موڑ مھیاں پر لایو
سکولوں باپ ہٹاتو نہ
راجو ٹھہلا کھاتو نہ
باپ نا چسکو ددھ کو آوے پھرڑی بیچے لاری لیاوے
کمی لگی تے قرضو چاوے نہ مگے تے زمی بکاوے
ایویں چسکا لاتو نہ
راجو ٹھہلا کھاتو نہ
گھر کو دولت مال مکایو نکا جھیا کو بیاہ کرایو

جس دم شیرو ہوش ماں آہو وہ چھوڑی تے ہور لیا ہیو

بیہ ور مال اڈاتو نہ

راجو ٹھہلا کھاتو نہ

باپ راجو کو بڑو پکھنڈی بولیو کوئے تے چالئی ڈنڈی

ننھی عدالتاں وچ ترنڈی پئی تماشا دیکھے منڈی

وکیلاں کول لٹاتو نہ

راجو ٹھہلا کھاتو نہ

گھر نہیں آٹو گھاہ تے اوکھر اڈپڈ گیا راجو کا چوکھر

اج اس کو کل اُس کو نوکر کھانی پئی در در کی ٹھوکر

ہتھوں وقت کھڑاتو نہ

راجو ٹھہلا کھاتو نہ

(شاعر: فضل حسین مشتاق)



1۔ لفظ تے اُن کا مطلب

- چسکو : عادت، بھٹک
پھرڑی : دُده نہ دین آلی مھیس یاگاں
لاڑی : دُده دین آلی مھیس یاگاں
پکھنڈی : فریبی
اوکھر : اوہ گھاہ جہڑ و مال کھان توں بعد چھوڑے
چوکھر : مال ڈنگر

2۔ سوالات:

- (۱) راجو کا ٹھہلا نظم کو خلاصہ لکھو۔
- (۲) راجو کا ٹھہلا نظم کس نے لکھی ہے؟
- (۳) راجو کا ٹھہلا نظم ماں کے پیغام دے تو گیو ہے؟
- (۴) راجو کو باپ کیسے جنتھو؟
- (۵) راجو نا باپ نے سکولوں کیوں ہٹایو؟

3۔ ان لفظاں نا اپنا جملہاں ماں برتو۔

دوجی، مھیس، ہوش، قرضو، ٹھہلا، گھاہ، اوکھر